

aab

MALAYSIA MASIH BUKA OPSYEN MENGENAI SIDANG BUMI
Mahathir-ALAM SEKITAR

SINGAPURA, 28 Jan (Bernama) -- Malaysia akan hanya menghadiri Persidangan Bangsa-bangsa Bersatu mengenai Alam Sekitar dan Pembangunan (UNCED) di Brazil pada Jun ini jika ia bukan bermotif politik, kata Perdana Menteri, Datuk Seri Dr Mahathir Mohamad hari ini.

Katanya, Malaysia belum membuat keputusan sementara menunggu keputusan yang akan dibuat pada dua mesyuarat persediaan bagi mengatur persidangan bumi itu.

+Jika kami merasakan wajar ia satu persidangan mengenai alam sekitar yang bukan bermotif politik, maka kita akan hadir, + katanya pada persidangan akhbar di akhir Sidang Kemuncak Asean Keempat di sini.

Katanya, Malaysia tidak pernah menyatakan yang ia tidak akan menyertai persidangan itu tetapi hanya menyatakan ia mungkin tidak akan hadir sekiranya persidangan itu digunakan untuk mengkritik Malaysia berhubung dengan alam sekitar.

+Pada satu ketika, kita kurang yakin sama ada mesyuarat itu bertujuan untuk membincangkan isu-isu alam sekitar ataupun untuk menjatuhkan sebuah kerajaan. + -- Lagi

▼28/01/21-48MST

AAB

Mahathir - Alam Sekitar 2 (Akhir) Singapura

+Terdapat cakap-cakap bahawa mereka harus menumpukan perhatian kepada Malaysia dan membuat berbagai-bagai perkara yang pelik, + katanya.

Perisytiharan Singapura yang dimeterai para pemimpin Asean di akhir sidang kemuncak itu menggariskan keperluan bagi negara maju untuk membantu mengekalkan alam persekitaran antarabangsa yang menyokong pertumbuhan ekonomi dan pembangunan.

Para pemimpin itu berkata, Asean kini ternanti-nantikan untuk melihat komitmen tersebut dibayangkan dalam hasil Persidangan di Rio de Janeiro itu.

Mengenai negara anggota Asean yang baru, Datuk Seri Dr Mahathir berkata bahawa Malaysia berharap Vietnam dan Laos dapat menganggotai kumpulan serantau itu dalam tempoh lima tahun.

+Kami berpendapat bahawa mereka haruslah menjadi anggota dalam tempoh lima tahun...kami akan berusaha keras ke arah itu, + katanya.

Dalam perisytiharan itu para pemimpin Asean bersetuju untuk menyambut baik semua negara di Asia Tenggara yang berhasrat memperakui Perjanjian Persahabatan dan Kerjasama. -- Bernama.

▼28/01/21-54MST